

## Inatsisissatut siunnersuummut nassuaatit

### **Nalinginnaasumik nassuaatit**

#### 1. Aallarniut

Inatsisartuni ilaasortat aningaasarsiaqartitaanerat pillugu inatsisip § 2-ani sulinngiffeqarallartarneq pillugu malittarisassat pisariillisinneqarnissaat allannguutissatut siunnersuummi siunertaavoq, taamaalillutik ilaasortap Inatsisartut ataatsimiinnerannut allatullu suliaannut najuutinnginnera qaqugukkut sulinngiffeqarallarnertut pissutissaqavilluniluunniit najuutinnginnertut il.il. akuersissutigineqartarnissaa pillugu siunissami Inatsisartut malittarisassanik pituttuisunik atuutsilersitsisartussangorlugit.

Inatsisartut Siulittaasuata sulinngiffeqarallarsinnaaneranut malittarisassat maannamut § 6, imm. 10, malillugu immikkut naatsorsorneqartartut siunissami Inatsisartunut ilaasortanut allanut atuuttut malillugit naatsorsorneqassasut tamatuma saniatigut siunnersutigineqarpoq, § 2, takujuk. Taamak iliornikkut Inatsisartut Siulittaasuata maannamut piginnaatitaaffii allannguuteqassanngillat. Tamanna naapertorlugu § 6, iluarsineqassaaq iluatsillugulu ilusissaminut eqqortumut iluarsineqarluni, tassami allannguinermi kingullermi § 6, imm. 6, maannakkut malittarineqartup qanoq siusinnerusukkut § 6, imm. 6, pissusissamisoortumik taarsersimaneraa qularineqarsinnaammatt.

#### 2. Siunnersuummi immikkoortut pingaernerit

Malittarisassat arlallit Inatsisartut atuunnerini maleruarneqartussat misissuiffigineqarnissaat pisariaqarnersoq isumasioqatigiinnerni 25. aamma 26. februar 2014-imi taamatullu aamma 10. aamma 11. januar 2015 ingerlanneqartumi Inatsisartut Siulittaasoqarfiata eqqartuiffigisimavai. Aningaasarsiaqartitaaneq pillugu inatsimmut atuuttumut il.il. tunngatillugu, ilaasortap Inatsisartut ataatsimiinnerannut najuutinnginnera qaqugukkut sulinngiffeqarallarnertut pissutissaqavilluniluunniit najuutinnginnertut il.il. akuersissutigineqartarnissaa pillugu siunissami Inatsisartut malittarisassanik pituttuisunik atuutsilersitsisarnissaat kissaatigineqarluni. Aningaasarsiaqartitaaneq pillugu inatsimmi maannakkut malittarisassat atatillugu pisariillisarneqassapput.

Malittarisassat Inatsisartut Siulittaasuata sulinngiffeqarallarsinnaaneranut tunngassuteqartut § 2, imm. 6-imi Inatsisartuni ilaasortanut allanut atuuttut ilagalugit siunissami malittarisassiuunneqartassasut siunnersutigineqarpoq.

Tamanna naapertorlugu § 6-imi, imm 10 aamma 11 allanngortinnejassapput, iluatsillugulu § 6 tamaat pissusissamisoortumik ilusilerneqarluni.

*2.1 Inatsisartunut ilaasortat sulinngiffeqartarnerat il.il. pillugu malittarisassanik Inatsisartut aalajangersaanerat.*

Aningaasarsiaqartitaaneq pillugu inatsisip atuuttup § 2, imm. 2, 2-ani, ima aalajangersagaqarpoq ”Inatsisartut Siulittaasoqarfiat sulinngiffeqarallarnerup akuersissutigineqarnissaanut najoqqutassanik suliarinnissaaq”. Peqatigitillugu qaqugukkut ilaasortap Inatsisartut ataatsimiinnerini najuutinnginnera pissutissaqavissumik najuutinnginnertut isigineqassanera pillugu aningaasarsiaqatitaanermut inatsit aralinnik malittarisassaqarpoq. Ingammillu § 2, imm. 4, aamma 5, ima aalajangersaasut saqqummerpoq, ”Napparsimaneq qanigisalluunniit toquneranut perululluniluunniit napparsimanaeranut atatillugu najuutinnginneq pissutissaqavilluni najuutinnginnertut isigineqassaaq. Najuutinnginnermi Namminersorlutik Oqartussani kommuninilu tjenestemandinut malittarisassat qaqugukkulluunniit atuuttut malillugit akiliunneqarluni angalasoqarsinnaatitaavoq. Naartunermut, erninermut, meeravissiartaarnermullu atatillugu najuutinnginneq peqquteqavilluni najuutinnginnertut isigineqassaaq”. Inatsisartut Siulittaasuata sulinngiffeqartarneranut malittarisassat maannamut aamma taamaapput, taamaattorli taakku allami inisisimallutik, tassa § 6, imm. 10, aamma 11-mi.

Aningaasarsiaqartitaanermut inatsisip sammisamut tunngatillugu malittarisassiorsinnaanermut tunngaviata inatsimmi ”ilitsersummi” atuutsilersitsineq” allassimanera ”malittarisassanik atuutsilersitsineq” allassimalersillugu taarserneqarnissa Inatsisartut Siulittaasoqfiannit pitsaasuuusutut isigineqarpoq. Taamak oqaasertaliinerup malittarisassanut atuutsilersinnejartunut Inatsisartunut ilaasortat inatsisitigut pituttugaanerat ersarisisissavaa. Oqartussaasut malittarisassanik atuutsilersitsisut siunnersuut malillugu tassaassapput Inatsisartut, tassami iluarsiissut Inatsisartut suleriaasiat taannaluunniit naapertorlugu pisariaqarmat.

Aningaasarsiaqartitaanermut inatsimmi malittarisassat qulaani issuarneqartut immikkualuttulerujussuit § 2, imm. 4 aamma 5, atorunnaarsinnejqarnissaat atatillugu siunnersuutigineqarpoq. Siunissami sulinngiffeqartarneq pillugu malittarisassani pituttuisuni Inatsisartut atuutsiligassaanni, taakku imarisat ersersinnejqassapput.

Inatsisartut Siulittaasuata sulinngiffeqartarnera pillugu maannamut malittarisassat § 6, imm. 10 aamma 11, aalajangersakkamit peerneqarnissaat siunnersuutigineqarpoq, taamaalillutik § 2-mut malittarisassanullu tassunga malittarinnejqartunut siunissami ilaalerlutik. Siunissami Inatsisartut sammisamut malittarisassiorneranni maannakkutut Siulittaasup ilaasortallu allat akornanni assiginngitsunik malittarisassaqarnissa pisariaqarsorineqanngilaq.

Sulinngiffeqartarneq pillugu malittarisassat ataatsimut isigalugu pisariillisinneqassapput sammisamullu malittarisassanik pituttuisunik atuutsilersitsinssaminut Inatsisartut periarfissaqalissapput. Maannamut taamaallaat sammisamut "ilitsersuutinik" Inatsisartut Siulittaasoqarfiat atuutsilersitsisinnaavoq, tamannalu annikinnerusuinnarnik iluarsiihinnaanermut periarfissatut paasineqarsinnaavoq. Malittarisassallu taamaattut, Inatsisartunit tamarmiusunit akuersissutigineqannginnamik, sunniutaat annikinnerupput, Siulittaasoqarfiullu sammisamut ilitsersuutinik atuutsilersitsisinnaanermut tunngavissami maannamut atunnginnissaa ulluinnarni ingerlaatsimini qinersimavaa.

Sammisamut sulinngiffeqarallartarnermut il.il. tunngassutilimmumt malittarisassanik atuutsilersitsisarneq qaqugukkulluunniit inatsisit sinaakkusiinerat malillugu pisassasoq oqaatigineqassaaq. Malittarisassani atuutilersussani sulinngiffeqarallartarnermut il.il. malittarisassat imarisamikkut ullumikkornit allaanerunissaat Inatsisartut Siulittaasoqarfiannit maannangaaq ilimagineqanngilaq. Ingammillu ingerlaatsimik atuuttumik qasukkaanissaq ilimagineqarani, tassami Inatsisartunut ilaasortaaneq inatsisit malillugit pisussaaffeqarluni inuiaqatigiinnut sullissilluni atuuffiummat, taamaanneratalu najuutinngissinnaanermut sulinngiffeqarallarsinnaanermullu akuersissutinik tunniussisarnermi ingerlatseraatsimik qasukkaasinnaanermut peeriarfissat maannamut naleqqiullugu annikitsuararsuutippai.

## *2.2 Inatsisimmi § 6-ip eqqortumik oqaasertalerneqarnera*

Inatsimmik allannguinermi kingullermi (inatsisartut inatsisaat nr. 2, 15. april 2011-meersoq) arlalinnik allanguisoqarpoq ilaatigut § 6, allannguiteqarluni. Aalajangersakkap imm. 6-ip nutaamik oqaasertaliorneqarnera allannguutit taakku ilagaat.

§ 6, imm. 6-imik allannguinermi tassani teknikkikkut kukkusqarsimavoq, tassami allannguut oqaatsinik ukuninnga aallarniuteqartussaagluarami: "§ 6, imm. 6 imatut oqaasertaqassaaq". Imm. 6-ip nutaap imm. 6 nutaanngitsoq taarseraa paasitinniarlugu oqaasertaliineq taamaattoq atorneqarpoq.

Allannguut taarsiullugu oqaatsinik ukuninnga aallarniuteqartinneqarpoq: "§6-imi, imm. 6-itut ilanngunneqassaaq". Oqaasertaliineq ("ilanngunneqassaaq") pitsaanngilaq, tassami oqaasertanut pioreersunut tapiliussatut oqaasertanik ikkussisoqarnera paasitinniarlugu taanna nalinginnaasumik atorneqartarmat. Oqaasertaliussaq taamaammat imm. 6-ip imarerriigaata attatiinnarniarneqarnera siunertaanersoq pillugu qularinnilersitsisinnaavoq.

Ataqatigiinneratigut toqqaannanngitsumik paasinarsivoq, ilaatigut imm. 8-p imarisaatigut, paasinarsilluni tassalu imm. 6-ip nutaap siusinnerusukkut imm. 6-iusoq taarsertussaagaa, taamaammallu teknikkikkut kukkussut taanna ulluinnarni ingerlatsinermi sukuiaalluni saqqummiussinermi ajornartorsiutinut peqqutaasimanngilaq. Tamannaana pillugu manna iluatsillugu § 6, tamaat siunertaq malillugu ilusilerlugu sukuiarneqarpat

naapertuilluarnerpaatut isigineqartoq. Taamaattorli § 6, imm. 10 aamma 11, § 2-p allannguutanut naapertuuttumik malitsitut iluarsineqassapput.

### *2.3 Inatsimmik allangortitsineq atuuttumut sanilliullugu.*

Malittarisassat atuuttut allannguutissatullu siunnersuutigineqartut malittuani imminnut sanilliullugit takutinneqarput:

<b>Inatsisissatut siunnersuut inatsimmut atuuttumut sanilliullugu</b>	
Oqaasertai atuuttut	Inatsisissatut siunnersuut
	<p style="text-align: center;"><b>§ 1</b></p> <p>Inatsisartunut Naalakkersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaanni nr. 22-mi 18. december 2003-meersumi, kingullermik inatsisartut inatsisaatigut nr. 2, 15. april 2011-meersukkut allangortinneqartumi, makku allannguutigitinneqassapput:</p>
<p><i>Imm. 2. Inatsisartuni ilaasortaq Kalaallit Nunaanni Inatsisartut Suleriaasianni maleruagassat naapertorlugit ilaasortatut sulinngiffeqarallarnissamik Inatsisartut Siulittaasoqarfiannit akuersissuteqarfigineqartoq aningaasarsianik aningaasartuuteqarnermullu tapisianik piffissami sulinngiffeqarallarfimmini pisinnaanngilaq. Inatsisartut Siulittaasoqarfiat sulinngiffeqarallarlarnerup akuersissutigineqarnissaanut najoqqutassanik suliarinnissaaq. Immikkut ittumik pisuni sin-niisussamik aggersaanermut atatillugu aningaasartuutit akilerneqarnissaat sulinngiffeqarallarnermik akuersinissamut tunngavissanngortinneqarsinnaavoq.</i></p> <p><i>Imm. 3. Inatsisartut Siulittaasoqarfiata Inatsisartuni ilaasortaq sulinngiffeqarallarnissamik akuersissuteqarfigippagu piffissami sulinngiffeqarallarnermi pineqartoq</i></p>	<p><b>1. § 2, imm. 2-5 ima oqaasertaqassapput:</b>  <i>"Imm. 2. Inatsisartunit sulinngiffeqarallartarnermut najuutinngikkallartarnermullu akuersisarnermut malittarisassanik Inatsisartut aalajangersaassapput.</i></p> <p><i>Imm. 3. Aningaasarsiaqaataasumik sulinngiffeqarallarsinnaaneq aatsaat akuersissutigineqarsinnaavoq Inatsisartunut ilaasortaq pissutissaqavilluni najuussinnaanngippat imaluunniit malittarisassat imm. 2 malillugu aalajangersarneqartut tassungalu assersuunneqarsinnaasut malillugit.</i></p> <p><i>Imm. 4. Inatsisartunut ilaasortaq pisuni immikkorluinnaq ittuni aningaasarsiaqaataanngitsumik sulinngiffeqarnissamut akuerineqarpat, ilaasortaq aningaasarsiaqartitaassanngilaq aningaasartuutinulluunniit tapiissutinik pisartagaqassanani, taamatullu aamma sulinngiffeqarallarnerup nalaani</i></p>

<p>soraarnerussutisiassanik katersissanngilaq.  Aamma Inatsisartuni ilaasortaq  Naalakkersuisuni ilaasortatut atuuuffimminik tamakkiisumik aallussiniarnini pissutigalugu sulinngiffeqarallarnissamik  akuersissuteqarfigineqartoq piffissami sulinngiffeqarallarnermini  soraarnerussutisiaqalernissamut  katersisinnaanngilaq.</p> <p><i>Imm. 4.</i> Napparsimaneq qanigisalluunniit toquneranut perululluniluunniit napparsimaneranut atatillugu najuutinnginneq pissuteqavilluni najuutinnginnertut isigineqassaaq.</p> <p><i>Imm. 5.</i> Naartunermut, erninermut meeravissiartaarnermulluunniit atatillugu sulinngiffeqarallarneq pissuteqavilluni najuutinnginnertut isigineqassaaq.</p>	<p>soraarnerussutisiassanut ilaasortajunnaarnersiutinulluunniit katersaqarsinnaanani. Aammattaaq sulinngiffeqarallarnissamut akuersissuteqarnissamut sinniisussamik aggersaanermi aningaasartuutinik Inatsisartunut ilaasortap akiliuteqarnissaamut piumasqaatigineqarsinnaavoq.</p> <p><i>Imm. 5.</i> Inatsisartunut ilaasortaq Naalakkersuisunut ilaasortatut atuuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani ilaasortajunnaarnersiutissanik katersisinnaanngilaq.”</p>
<p>(Qulaani § 2, imm. 4, oqaaseqatigiit aappaat takuuk)</p>	<p><b>2. § 4-mi imm. 4-p kingornanut immikkoortutut nutaatut ikkunneqassaaq:</b>  ”<i>Imm. 5.</i> Qanigisamik toqusqartillugu pinartumilluunniit napparsimasoqartillugu malittarisassat Namminersorlutik Oqartussani tjenestemandinut qaqugukkulluunniit atuuttut malillugit akiliunneqarluni angalasoqarsinnaavoq.”</p>
<p><b>§ 6.</b> Inatsisartut siulittaasuat, Naalakkersuisut siulittaasuat Naalakkersuisunullu ilaasortat aningaasarsiat § 1, imm. 1-imi taaneqartut saniatigut ukiumut aningaasarsiaqartinneqassapput akissaateqarfii 38-ianni, nalinginnaasumik tapisiat ilanngullugit, akissarsianut naapertuuttunik. Aningaasarsiat naatsorsorneqartassapput Kalaallit Nunaanni ilinniagartuut kattuffiata ASG-p tjenestemandit akissarsiaasa il.il. iluarsineqarnerannut isumaqatigiissutai qaqugukkulluunniit atuuttut tunngavigalugit.</p>	<p><b>3. § 6 ima oqaasertaqassaaq:</b>  ”<b>§ 6.</b> Inatsisartut siulittaasuat, Naalakkersuisut siulittaasuat Naalakkersuisunullu ilaasortat aningaasarsiat § 1, imm. 1-imi taaneqartut saniatigut akissaatit inissismaffiat 38 malillugu aningaasarsianik tapisiyanik tamanut atuuttunik ilasanik ukiumut aningaasarsiaqartinneqassapput. Aningaasarsiat naatsorsorneqassapput tjenestemandit akissarsiaasa allallu iluarsivigineqartarnerat pillugu ASG-mut isumaqatigiissut qaqugukkulluunniit atuuttoq aallaavigalugu.</p>

<i>Imm. 2.</i> Inatsisartut siulittaasuannut Naalakkersuisullu siulittaasuannut kr. 120.930-nik immikkut tapisiaqartitsisoqassaaq.	<i>Imm. 2.</i> Inatsisartut siulittaasuannut Naalakkersuisullu siulittaasuannut kr. 120.930-nik immikkut tapisiaqartitsisoqassaaq.
<i>Imm. 3.</i> Naalakkersuini ilaasortanut Inatsisartuni ilaasortaanngitsunut Inatsisartuni ilaasortat aningaasarsiaasa § 1, imm. 1-imi taaneqartut angeqataannik tapisiaqartitsisoqassaaq.	<i>Imm. 3.</i> Naalakkersuisunut ilaasortanut Inatsisartunut ilaasortaanngitsunut Inatsisartunut ilaasortat aningaasarsiaasa § 1, imm. 1-imi taaneqartut annertoqataannik tapisiaqartitsisoqassaaq.
<i>Imm. 4.</i> Inatsisartut siulittaasuut, Naalakkersuisut siulittaasuut Naalakkersuisunilu ilaasortat qaammatip qinigaaffimmik aallaqqaataanit qaammatip taamatut atuukkunnaarfimmik naanissaata tungaanut aningaasarsiaqartinneqassapput. Aningaasarsiat qaammammut siumoortumik tunniunneqassapput. Imm. 1 - 3-mi taaneqartutut aningaasarsiat tapisiallu iluarsiivigineqartarnerisa ASG-mi isumaqatigiinniuteqartarfimmi ineriarneq malittaraat.	<i>Imm. 4.</i> Inatsisartut siulittaasuut, Naalakkersuisut siulittaasuut Naalakkersuisunullu ilaasortat qaammatip qinigaaffiup aallaqqaataanit qaammatip taamatut atuukkunnaarfifiup naanissaata tungaanut aningaasarsiaqartinneqassapput. Aningaasarsiat qaammammut siumoortumik tunniunneqassapput. Imm. 1 - 3-mi taaneqartutut aningaasarsiat tapisiallu iluarsiivigineqartarnerisa ASG-mi isumaqatigiinniuteqartarfimmi ineriarneq malittaraat.
<i>Imm. 5.</i> Inatsisartut siulittaasuut Naalakkersuisullu siulittaasuut ineqartinneqassapput. Siulittaasut ineqartinneqarnerminnut akiliuteqartassanngillat, ukiumulli attartornerup kr. 48.000-inik nalilerneqarnera tunngavigalugu akileraartinneqartassallutik. Namminersorlutik Oqartussat inissianik ingerlatsinermut aningaasartuutit akilertassavaat. Inissianut atatillugu ingerlatsinermut aningaasartuutit isertitat akileraaruteqaataasussat naatsorsorneqarneranni ilaatinneqartassanngillat.	<i>Imm. 5.</i> Inatsisartut siulittaasuut Naalakkersuisullu siulittaasuut ineqartinneqassapput. Siulittaasut inigisap attartorneranut akiliisassanngillat, ukiumulli attartornerup kr. 48.000 kr-inik nalilerneqarnera tunngavigalugu akileraartinneqassallutik. Namminersorlutik Oqartussat inissianik ingerlatsinermut aningaasartuutit akilertassavaat. Inissianut atatillugu ingerlatsinermut aningaasartuutit isertitat akileraaruteqaataasussat naatsorsorneqarneranni ilaatinneqartassanngillat.
<i>Imm. 6.</i> Naalakkersuisunut ilaasortat sinnerinut atorfimmut atasumik ineqartitsisoqassaaq. Naalakkersuisunut ilaasortat inissiani Namminersorlutik Oqartussanit sulisorisanut inissiatut innersuunneqartartuni ineqarnermut akiliutip	<i>Imm. 6.</i> Naalakkersuisunut ilaasortat sinnerinut atorfimmut atasumik ineqartitsisoqassaaq. Naalakkersuisunut ilaasortat inissiani Namminersorlutik Oqartussanit sulisorisanut inissiatut innersuunneqartartuni ineqarnermut akiliutip naatsorsorneqartarnerinut malittarisassat

<p>naatsorsorneqartarnerinut malittarisassat qaqugukkulluunniit atuuttut malillugit inissiamut pineqartumut ineqarnermut akiliutissap naatsorsorneqartup 60 %-ianik ineqarnermut akiliuteqartassapput.</p> <p><i>Imm. 7.</i> Procentip imm. 6-imí taaneqartup aamma sulisorisanut inissiamut ineqarnermut akiliutip tamakkiisup assigiinngissutaat inuit pineqartut isertitaasa akileraaruteqaataasussat naatsorsorneqarneranni ilaatinneqassanngillat.</p> <p><i>Imm. 8.</i> Inissiat imm. 5 aamma imm. 6 malillugit atugassiissutigineqartut atorfiup qimanneqarneranut atatillugu qimanneqartassapput. Inissiat pineqartut nutserfigineqarnerinut qimanneqarnerinillu atatillugu aningaasartuutit Namminersorlutik Oqartussanit matussuserneqartassapput.</p> <p><i>Imm. 9.</i> Piffissami ilaasortaajunnaarnersiuteqarfimmi utaqqiisaasumik ineqartitsisoqassaaq. Inissianut Namminersornerullutik Oqartussat attartortittagaannut ineqarnermut akiliutit naatsorsorneqartarnerinut maleruagassat qaqugukkulluunniit atuuttut naapertorlugit ineqarnermut akiliuteqartoqartassaaq. Piffissaq ilaasortaajunnaarnersiuteqarfik naappat inigisaq qimanneqassaaq.</p> <p><i>Imm. 10.</i> Napparsimaneq aamma qanigisap toquneranut napparsimarulunneranulluunniit atatillugu najuutinnginneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut isigineqassaaq. Najuutinnginnermi Namminersorlutik Oqartussani kommuninilu tjenestemandinut malittarisassassat qaqugukkulluunniit atuuttut malillugit akiliunneqarluni angalasoqarsinnaatitaavoq.</p> <p><i>Imm. 11.</i> Naartunermut, erninermut meeravissiartaarnermulluunniit atatillugu sulinngiffeqarneq Naalakkersuisut Siulittaasuannut Naalakkersuisunullu</p>	<p>qaqugukkulluunniit atuuttut malillugit inissiamut pineqartumut ineqarnermut akiliutissap naatsorsorneqartup 60 %-ianik ineqarnermut akiliuteqartassapput.</p> <p><i>Imm. 7.</i> Procentip imm. 6-imí taaneqartup aamma sulisorisanut inissiamut ineqarnermut akiliutip tamakkiisup assigiinngissutaat inuit pineqartut isertitaasa akileraaruteqaataasussat naatsorsorneqarneranni ilaatinneqassanngillat.</p> <p><i>Imm. 8.</i> Inigisat imm. 5 aamma 6 malillugit atugassiissutigineqartut atuuffiup naanerani qimanneqassapput. Inissiat pineqartut nutserfigineqarnerinut qimanneqarnerinillu atatillugu aningaasartuutit Namminersorlutik Oqartussanit matussuserneqartassapput.</p> <p><i>Imm. 9.</i> Piffissami ilaasortaajunnaarnersiuteqarfimmi utaqqiisaasumik ineqartitsisoqassaaq. Inissianut Namminersornerullutik Oqartussat attartortittagaannut ineqarnermut akiliutit naatsorsorneqartarnerinut maleruagassat qaqugukkulluunniit atuuttut naapertorlugit ineqarnermut akiliuteqartoqartassaaq. Piffissaq ilaasortaajunnaarnersiuteqarfik naappat inigisaq qimanneqassaaq.</p> <p><i>Imm. 10.</i> Napparsimaneq aamma qanigisap toquneranut napparsimarulunneranulluunniit atatillugu najuutinnginneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut isigineqassaaq. Najuutinnginnermi Namminersorlutik Oqartussani kommuninilu tjenestemandinut malittarisassassat qaqugukkulluunniit atuuttut malillugit akiliunneqarluni angalasoqarsinnaatitaavoq.</p> <p><i>Imm. 11.</i> Naartunermut, erninermut meeravissiartaarnermulluunniit atatillugu sulinngiffeqarneq Naalakkersuisut Siulittaasuannut Naalakkersuisunullu</p>
--	--

peqataannginnertut isigineqassaaq.	ilaasortanut pissutissaqavilluni peqataannginnertut najuutinnginnertut isigineqassaaq.”
	<b>§ 2</b> Inatsisartut inatsisaat una ulloq 1. juli 2015 atuutilerpoq.

### 3. Pisortanut aningaasaqarnikkut allaffissornikkullu kingunissai

Siunnersuutip pisortanut aningaasartuutinik allaffissornermillu sunniutilimmik annertussusilimmik kinguneqarnissaa ilimagineqanngilaq.

Inatsisartunut ilaasortanut sulinngiffeqarallartarnermut il.il. malittarisassanik atuutsilsilernissamik Inatsisartut suliakkerneqassapput, inatsimmik atuutsilersitsineq, inatsimmilluunniit nutarterineq allaffissornikkut suliakkersuutinik nassataqartarput. Taamaattorli suliassamut assingusumut Siulittaasoqarfik pisussaaffequareersoq, tassami inatsimmi maannamut atuuttumi § 2. Imm. 2, 2 malillugu sammisamut “ilitsersuutinik” atuutsilersitsissalluni Siulittaasoqarfiup siulianili pisussaaffigaa.

Malittarisassat § 2-p malittuatut aalajangersarneqartut tunngavimmikkut nunatta karsianut iluaqutaasumik ajoqutaasumillu aningaasaqarnikkut kinguneqarsinnaapput. Inatsisartut malittarisassanik ullumikkornit sukanganerusunik killilersuiffiunnginnerusumilluunniit aalajangersaanissartik toqqarneraat sunniummut apeqqutaavoq. Taamaattorli sulinngiffeqarallartarneq il.il. pillugit maannamut periuserineqartup qasukkarneqarnissaanut inatsisit annikitsuinnarmik periarfissiippit. Inatsisartuni Naalakkersuisunilu il. il. ilaasortat pillugit Inatsisartut inatsisissaanni § 4, takujuk, Inatsisartunut ilaasortatut atuuffeqarneq taanna malillugu pisussaaffittut innuttaasunik sullissineruvoq.

### 4. Suliffeqarfinnut aningaasaqarnikkut allaffissornikkullu kingunissat

Siunnersuut suliffeqarfinnut aningaasaqarnikkut allaffissornikkullu kinguneqassanngilaq.

### 5. Avatangiisinut, pinngortitamut innuttaasullu peqqinnerannut kingunerisassat

Siunnersuut avatangiisinut, pinngortitamut innuttaasullu peqqinnerannut kinguneqassanngilaq.

### 6. Innuttaasunut kingunerisassat

Siunnersuut innuttaasunut kinguneqassanngilaq.

### 7. Kingunerisassat allat pingaarutillit

Siunnersuut allanik pingaarutilinnik kinguneqassanngilaq.

## 8. Tusarniaaneq

Inatsisissatut siunnersuut tusarniaatigineqarsimanngilaq, nalilerneqarmat siunnersuut innuttaasunut inuussutissarsiornermulluunniit kinguneqassanngitsoq.

### **Inatsisissatut siunnersuummi aalajangersakkanut ataasiakkaanut nassuiaatit**

#### *§ 1-imut*

##### Nr. 1-imut

Imm. 2-p maannamut § 2, imm. 2, oqaaseqatigiit aappaat, “Inatsisartut Siulittaasoqarfiat sulinngiffeqarallartarnerup akuersissutigineqarnissaanut najoqqutassanik suliarinnissamik” Inatsisartut Siulittaasoqarfiannik pisussaaffiliisoq taarserpaa. Aalajangersakkap siunnersuutigineqartup taarsiullugu “malittarisassanik aalajangersaanissamik” Inatsisartut pisussaaffilerpai, taamaanneratalu malittarisassat atuutsilerniqartut inatsisitigut pituttuisuunerat paatsuugassaanngitsumik nalunaarpaa. Inatsisartut suleriaasiata ilaatut assinganilluunniit qaffassisusilimmik atuutsilersitsinerup pinissaa ilimagineqarpoq. Malittarisassiaq innuttaasunut pinnani taamaallaalli Inatsisartunut ilaasortanut allaffisornermullu atuuppoq.

Malittarisassanik atuutsilersitsinerup qaqugukkulluunniit inatsisini malittarisassat atuuttut ataqqissavai, taakkumi Inatsisartunut maligassiissutinit salliuinneqartuarmata.

Nangillugu Inatsisartut sulinngiffeqarallartarneq pillugu malittarisassaasa sulinngiffeqarallarnissamut akuersissutinik tunniussisarnemut Inatsisartuniillu najuutinngikkallartarnermut malittarisassanik imaqarnissaa aalajangersakkap erseqqissarpa, tassunga atatillugu imm. 3 aamma 4 takukkit, akissarsiaqaataasumik akissarsiaqaataanngitsumilluunniit sulinngiffeqarallarsinnaaneq taakku malillugit akuersissutigineqarsinnaavoq. Atatillugulu apeqqutit attuumassuteqartut pillugit, soorlu sinniisussamik aggersaasarnermut tunngassuteqartunik Inatsisartut malittarisassiorsinnaapput.

Aningaasarsiat pillugit malittarisassiornermut tunngatillugu, sulinngiffeqarallarnerup najuutinnginnerullu nalaani soraarerussutisiassat, aningaasartuuteqarnermut matussusiisarneq allallu tunngaviatigut taamaallat inatsisitigut malittarisassiuunneqarsinnaapput. Taamaammat piginnaatitaaffit atuuttut Inatsisartut sulinngiffeqarallartarneq pillugu malittarisassaasa aallaavittut uteqqiinnarsinnavaat, Inatsisartullu suleriaasiat il.il. naapertorlugu akuerineqarsinnaasoq qaangernagu immersuisinnaalluni erseqqissaateqarsinnaallunilu.

Sulinngiffeqarallartarneq najuutinngittarnerlu imm. 2-mi immikkoortinneqarput, tamannalu malittarisassani maannamut atuuttuni ingerlatsinermilu takussaareerpoq.

Sulinngiffeqarallartarnermut il.il. malittarisassiassani, inatsisit sinaakkusiinerisa iluanni oqaatsit katitigaanerisigut sulinngiffeqarallartarnermut najuutinngittarnermullu tunngassuteqartut akornanni erseqqinnerusumik Inatsisartut killilersuisinnaapput.

Inatsisip oqaatsimik “sulinngiffeqarallarnermik” atuinera, maannamut pisunut Inatsisartunut ilaasortap inatsisit malillugit peqqutissaqvinnani najuutinngikkallarnissamik kissaateqarnerani atorneqartussiaasimavoq, § 2, imm. 2 maannamut atuuttoq takujuk.

Taaguusersueriaaseq taanna nalorninermut tunngaviusarsimavoq taamaammallu allanngortinnejarnissaa siunnersuutigineqarpoq, imm. 3 aamma 4 takukkit. Tamatumalu nassatarisaanik Inatsisartut sulinngiffeqarallartarnermut malittarisassaasa oqaatsinik atuinermut nalinginnaasumut naapertuunnerulernissaat ilimagineqarpoq, tassani erninermut meeravissiartaarnermullu il.il. atatillugu sulinngiffeqartarnermut tunngatillugu ilaatigut “napparsimalluni sulinngiffeqarallarneq” imaluunniit “sulinngiffeqarallarneq” oqaatigineqarlutik.

Taaguut “najuutinngikkallarneq” soorlu nappaammik timmisartoqarfimmiluunniit suliumajunnaarnermik il.il. patsiseqartumik tassanngaannaq takkutumik akornuserneqarluni, sivikinnerusumik najuutinnginnermut nalinginnaasumik taaguutigitinneqarpoq.

Inatsisartut maannakkut suleriaasianni, sulinngiffeqartarneq najuutinngikkallartarnerlu Inatsisartut sulineranni allaffissornikkullu assigiinngitsunik ingerlatseriaaseqarluni atorneqartarput, tamanna ingammik sulinngiffeqarallarnissamut akuersissutip sulinngiffeqarallarnerup nalaani sinniisussamik aggersaanermik nassataqartarnera nalinginnaasuummat. Inatsisartut suleriaasianni § 58, imm. 1-imut innersuussisoqarpoq, Inatsisartunut ilaasortaq sulinngiffeqarallarnissamut akuersissummik tunineqarpat taava taanna malillugu sinniisussamik aggersaasoqassaaq. Ullut 14-it pallillugit najuutinngikkallarnermut atatillugu sinniisussamik aggersaanissaq Siulittaasoqarfiup ingerlatsinermini maannamut nalinginnaasumik qinertarsimanngilaa, naak taamaaliornissamut periarfissaqaraluartoq, suleriaatsimi § 58, imm. 2 naapertorlugu.

Najuutinngikkallarnissamut akuersissummik aningaasarsiaqaatalimmik tunniussisoqartuaannarpoq, tamannalumi aningaasarsiaqaatigalugu sulinngiffeqarallartarnermut assinguvoq, imm. 3 takujuk. Tamanna pillugu Siulittaasoqarfimmut Allattoqarfimmulluunniit nalunaartoqarpat, akuersissummik tunniussinerup nalunaarutigineqarsimasup annerusumik malitseqartinneqarnissaanut maannamut ingerlatsineq malillugu tunngavissaqartarsimannilaq.

Inatsisartunut ilaasortap akissarsiaqaataasumik sulinngiffeqarallarnissamut akuersissummik tunineqarsinnaanera imm. 3-p nassataraa. Ilaasortap pissuteqavissumik najuutinnginnera

Inatsisartulluunniit sulinngiffeqarallartarnermut malittarisassaanni pissuteqavissumik najuutinnginnermik pisumik assersuutaasinnaasumik tikkuaasoqarsinnaanera tamatumani piumasaqaataavoq.

Inatsisartut Naalakkersuisullu pillugit Inatsisartut inatsisaanni § 4, imm. 1-imi, “Inatsisartunut ilaasortaaneq inuiaqatigiinnit toqqagaanikkut suliassiissutitut pisussaaffiuneranik” aalajangersaasup sukuiarneratigut qaqgukkut peqquteqavissumik najuutinngittoqarnera paasineqarsinnaavoq. Inatsimmi tassani § 4, imm. 2, ima allassimavoq: “Inatsisartunut ilaasortaq tunuarniuteqarpat imaluunniit sulinngiffeqarnissamik akuerineqaqquppat qinnuteqarneq akuerineqarsinnaanersoq Inatsisartut aalajangissavaat.”

Aalajangersagaq issuarneqartoq eqqarsaatigalugu, “pissutissaqavilluni najuussinnaannginnej” pisussaaffigalugu atuuffimmut takkutinnginnissamut tunngavissatut akuerineqarluni atuuttutut paasineqassaaq. Pisussaaffittut inuiaqatigiinnut sullissinermit najuutinnginnissamut peqqutaasinnaanermut piumasaqaat taamaallaat napparsimanerup pissuteqavissumillu najuussinnaannginnerup naammassivaat.

Maannamutulli allamik pissutissaqavilluni najuussinnaannginnermut assingusumik patsiseqarluni aningaasarsiaqaataasumik sulinngiffeqarallarnissamut Inatsisartut akuersinissamut periarfissaqassapput. Tamanna ingammik naartunermut, erninermut meeravissiartaarnermullu atatillugu piffissani aalajangersimasuni atuuppoq, qanigisalluunniit perulunnartumik napparsimanerani toqukkulluunniit qimagunnerani. Inatsimmi maannamut atuuttumi periarfissat taakku § 2, imm. 4-mi 5-imilu ersarissumik eqqaaneqarput (Inatsisartunut ilaasortanut), aamma § 6, imm. 10-mi 11-milu (Inatsisartut Siulittaasuannut). Aalajangersakkat taakku taaneqartut ilusitoqartik atorlugu ingerlateqqinnejqanngillat, malittarisassalli taakku assingi § 2, imm. 2 malittuatut Inatsisartunit aalajangersarneqarnissaat ilimagineqarpoq.

Taaguutit “sulinngiffeqarallarneq” aamma “pissutissaqavilluni najuussinnaannginnej” maannamut inatsimmi § 2-mi atorneqarnermittut atorneqanngillat, soorlu tamanna imm. 2-mut 3-mullu nassuaatini saqqummertoq. Sulinngiffeqartarneq pillugu Inatsisartut inatsisissaanni taaguutinik atuinerup Inatsisartunut ilaasortaanerup pisussaaffigalugu innuttaasunik sullissineruneranik inatsisiliat aalajangersagaannut naapertuutunngortinneqarnissa tamatumunnga pingaarnertut patsisaavoq. Taamaammat maannamut aningaasarsiaqartitaanermut inatsimmi § 2, imaluunniit § 6 imm. 10 aamma 11, qanoq paasinninnissamut nassuaatitut atorneqarsinnaanngillat.

Aammalu maannamut atuuttumi § 2 imm. 2, 1-imik aalajangersagaq imm. 4, 1-ip attappa, taanna malillugu ilaasortaq akissarsiaqaataanngitsumik sulinngiffeqarallartoq piffissami sulinngiffeqarallarnerup nalaani aningaasarsianik aningaasartuuteqarnermullu tapiissutinik pisinnaanngilaq. Aammattaaq sulinngiffeqarallarnermi soraarnerussutisiassanik

katersaqarsinnaannginneq pillugu malittarisassaq maannamut § 2, imm. 3, 1-imik aalajangersakkap ingerlateqqinneraa. Maannamut aaqqissuussaqttaanna malillugu akissarsiaqaataanngitsumik sulinngiffeqarallartarneq ilaasortaajunnaarnersiutinik katersaqarnermut ilanngullugu naatsorsorneqassannginneranik aalajangersagaq, atatillugu erseqqissaatigineqarpoq.

Akissarsiaqaataanngitsumik aningaasartuuteqarnermullu tapisianik pisartagaqarfiumngitsumik sulinngiffeqarallarnissamik akuersissuteqarsinnaanermut periarfissaq, pisunut immikkut ittunut atatillugu, soorlu ilaasortap pissutissaqavilluni najuutinnginnissaminut tassungaluunniit assingusumik tunngavissaqarani sulinngiffeqarallarnissamik pisariaqartitsineranut tunngatillugu Siulittaasoqarfiup naperiaanissamut maannamut periarfissaanik attassineruvoq.

Sulinngiffeqarallarnerup taamaattup aatsaat pisuni immikkorluinnaq ittuni atorneqarsinnaanera atatillugu erseqqissaatigineqarpoq.

Inatsisartuuneq pisussaaffigalugu innuttaasunik sullissinerummat akissarsiaqaataanngitsumik sulinngiffeqarallarnissamut nalinginnaasumik akuersisoqarneq ajornermut killiliineq taanna tunngaveqarpoq, Inatsisartut Naalakkersuisullu pillugit Inatsisartut inatsisaanni § 4 naapertorlugu. Taamaammat ilaasortap Inatsisartuni suliassaminik aallussissalluni pisussaaffigaa, pissutissaqavissumillu najuutinnginnissamut allamilluunniit ilungersunartumik tunngavissaqarani najuutinnginnissamik kissaateqaruni ilaasortaanerminnit tunuartariaqarluni, taamaalilluni Inatsisartunut ilaasortaq alla sinniisutut ilaasortangorsinnaaqquullugu.

Akissarsiaqaataanngitsumik sulinngiffeqarallarnissamut akuersisummik tunniussisoqarsimaneranik pisoq pingarnerpaaq tassaasimavoq Inatsisartunut ilaasortap Naalakkersuisunut ilaasortatut, Borgmesteritut, borgmesterip tulliatut kommunalbestyrelsismulluunniit ilaasortatut atuuffimmut ikkunniarluni sulinngiffeqarallarsimanera.

Tamatuma saniatigut suliassanik pinartunik ilaasortap isumaginnittariaqalerneranik nassataqartunik pisoqarsinnaavoq, soorlu namminersorluni ingerlatami ajornartorsiutanik aniusuisinniarlugu piffissami siumut aalajangikkami ikuuttariaqarneranik nassataqartumik pisoqarnerani. Akissarsiaqaataanngitsumik sulinngiffeqarallarnissamut akuersissut, assersuutigalugu sinniisussap aggersarneqarneranut aningaasartuutit matussuserlugit, Siulittaasoqarfiup naliliinera naapertorlugu ilaasortap inissisimaneranut naaperiaataasinnnaavoq tulluartoq. Periarfissaq taanna malittarisassiassani imm. 2-p kingorna atuutsilersinneqartussani attanneqarsinnaavoq.

Maannamut § 2, imm. 2, oqaaseqatigiit pingajuanni malittarisassaq atuuttoq § 4, oqaaseqatigiit aappaanni attanneqarpoq, taanna malillugu sulinngiffeqarnissamik

akuersissuteqarnissamut sinniisussamik aggersaanermi aningaasartuutinik Inatsisartunut ilaasortap akiliuteqarnissaa piumasaqaatigineqarsinnaavoq. Piumasaqaatip taassuma aatsaat “pisunut immikkut ittunut” atorneqartarnera tunngaviujunnaarpoq, tassami akissarsiaqataanngitsumik sulinngiffeqarallarnissamut akuersissummik tunniussinissaq isumaliutigineqaraangat imm. 1, malillugu immikkut ittumik tamanna tamatigut patsisissaqartarmat.

Maannamut § 2, imm. 3, oqaaseqatigiit aappaanni malittarisassaq atuuttoq imm. 5-imi attanneqarpoq, taanna malillugu Inatsisartuni ilaasortaq Naalakkersuisuni ilaasortatut atuuffimminik tamakkiisumik aallussiniarnini pissutigalugu sulinngiffeqarallarnissamik akuersissuteqarfingeqartoq piffissami sulinngiffeqarallarnermini soraernerussutisiaqalernissamut katersisinnaanngilaq. Naalakkersuisunut ilaasortat Naalakkersuisunut ilaasortaanerup nassatarisaanik ilaasortaajunnaarnersiuteqalernissaminut katersisarmata.

#### Nr. 2-mut

Maannamut § 2, imm. 4, oqaaseqatigiit aappaanni malittarisassaq aalajangersakkap ingerlateqqippaa, assinganik imaqarluni kisiannili inatsimmi inissisimanera pissusissamisoornerulersillugu. Maannamut aalajangersakkamut Kalaallit Nunaanni kommunini tjenestemandinut atuuttumut innersuussineq oqaasertaliornermiit peerneqarpoq, tassami Namminersorlutik Oqartussani tjenestemandinut malittarisassat kisimik pingaaruteqartutut isigineqassammata. Sammivinni taakkunani marlunni tjenestemandinut ullumikkut assigiinnik malittarisassaqarpoq, taamaalillunilu oqaasertaliornikkut allannguineq taanna piginnaatitaaffitsigut allannguinngilaq.

#### Nr. 3-mut

§ 6-ip maannamut imarisaa imm. 1-9-mi allanngortinnagu siunnersuutip uterpaa, tamanna paasiuminarsaanissaq eqqarsaatigalugu. Tamatuma tunngavia nassuaatini nalinginnaasuni immikkoortoq 2.2-mi itisiliivigineqarpoq.

Imm. 10-mi 11-milu oqaasertaliornerit allanngortinneqarput, taamaalilluni aalajangersagaq taamaallaat Naalakkersuisunut ilaasortanut tunngatillugu atortussanngorluni, tassani aamma Naalakkersuisut Siulittaasuannut. Aalajangersakkat taakku maannamut aamma Inatsisartut Siulittaasuannut atuussimapput, kisianniuna sulinngiffeqarallartarnermut najuutinngittarnermullu malittarisassat pineqarmata, siunissami § 2, malittarisassallu taassuma malitsigisaatut atuutsilersinneqartut Inatsisartut Siulittaasuannut atuutsinneqassapput. Qanigisamik toqusoqarneranut pinartumilluuniit napparsimasoqarneranut atatillugu akiilunneqarluni angalasinnaatitaanermut tunngatillugu, § 4, imm. 5, siunissami Inatsisartut Siulittaasuannut atuutissaaq, taanna Inatsisartut Siulittaasuannut maannamut atuussimasumik imaqarpoq.

*§ 2-mut*

Aalajangersakkakut tassuuna inatsisip allannguutaata qaqgu atuutilernissaa  
aalajangersarneqarpoq.